

ZAKONO

IZMJENAMA I DOPUNAMA ZAKONA O

NOVČANOJ EGZISTENCIJALNOJ NAKNADI

Član 1.

(Dopuna)

U Zakonu o novčanoj egzistencijalnoj naknadi („Službene novine Srednjobosanskog kantona“, broj: 9/20 i 7/22; u daljnjem tekstu: Zakon) iza člana 2. dodaje se član 2a. koji glasi:

„Član 2a.

(Ravnopravnost spolova)

Sve imenice koje se odnose na demobilisane branioce upotrijebljene u ovom zakonu samo u muškom ili ženskom rodu, odnose se na oba spola.“

Član 2.

(Izmjena)

U stavu (2) člana 4. Zakona tačke a) i b) mijenjaju se i glase:

„a) da je navršilo 50 godina a nema navršenih 57 godina života;

b) da ima prebivalište na području Srednjobosanskog kantona (u daljnjem tekstu: Kanton) u trajanju od najmanje 36 mjeseci neprekidno prije podnošenja zahtjeva;“.

Član 3.

(Izmjena)

U članu 5. Zakona tačka a) mijenja se i glasi:

„a) da ima prebivalište na području Kantona u trajanju od najmanje 36 mjeseci neprekidno prije podnošenja zahtjeva;“.

Član 4.

(Izmjena)

U stavu (1) člana 5a. Zakona tačka a) mijenja se i glasi:

„a) da ima prebivalište na području Kantona u trajanju od najmanje 36 mjeseci neprekidno prije podnošenja zahtjeva;“.

Član 5.

(Dopuna)

Iza člana 6. Zakona dodaje se član 6a. koji glasi:

„Član 6a.

(Upotreba ličnih podataka)

U postupku ostvarivanja prava na novčanu egzistencijalnu naknadu kantonalni organ uprave nadležan za braniocce i općinska služba za braniocce, kao kontrolori u smislu odredbi Zakona o zaštiti ličnih podataka („Službeni glasnik Bosne i Hercegovine“, broj: 49/06, 76/11 i 89/11), obrađuju lične podatke neophodne za utvrđivanje identiteta podnosioca zahtjeva za korištenje prava na novčanu egzistencijalnu naknadu, uključujući jedinstveni matični broj.“

Član 6.

(Dopuna)

Iza člana 18. Zakona dodaje se član 18a. koji glasi:

„Član 18a.

(Troškovi postupka)

(1) Troškove postupka u vezi s ostvarivanjem prava na novčanu egzistencijalnu naknadu snosi organ koji vodi postupak.

(2) U postupku ostvarivanja prava na novčanu egzistencijalnu naknadu ne plaća se taksa.

(3) Na novčana primanja u vezi s ostvarivanjem prava na novčanu egzistencijalnu naknadu ne plaćaju se porezi i doprinosi.“

Član 7.

(Stupanje na snagu i primjena ovoga zakona)

Ovaj zakon stupa na snagu osmoga dana od dana objave u „Službenim novinama Srednjobosanskog kantona“, a primjenjivat će se od 1. jula 2023. godine.

Broj: 01-02-617/23

27. juna 2023.

Travnik

PREDSJEDAVAJUĆI SKUPŠTINE

Dražen Matišić, s. r.